

郭 说

说郭

說郛卷第二

古典錄略

三墳書

清氣未升濁氣未沉遊神未靈五色未分中有其物冥冥而性存
謂之混沌混沌爲太始太始者元胎之萌也太始之數一一爲太
極太極者天地之父母也一極易天高明而清地博厚而濁謂之
太易太易者天地之變也太易之數二二爲兩儀兩儀者陰陽之
形也謂之太初太初者天地之交也太初之數四四盈易四象變
而成萬物謂之太素太素者三才之始也太素之數三三盈易天
地孕而生男女謂之三才三才者天地之備也遊神動而靈故飛
走潛化動植魚蟲之類必備於天地之間謂之太古太古生民之
始也太古之民皆壽盈易始三男三女冬聚夏散食鳥獸蟲魚草

言字卷一
木之實而男女構精以女生爲姓始三頭謂之合雄紀生子三世合雄氏沒子孫相傳記其壽命是謂敍命紀通紀四姓生子二世男女衆多羣居連逋從強而行是謂連逋紀生子一世通紀五姓是謂五姓紀天下羣居以類相親男女衆多分爲九頭各有居方故號居方氏居方氏沒生子三十二世強弱相迫欲生吞害中有神人提挺而出故號提挺氏

政典曰國無邪教市無淫貨地無荒土官無濫士邑無遊民山不童澤不涸其正道全矣正道全則官有常職民有常業父子不背恩夫婦不棄情兄弟不去義鳥獸不失長草木不失生皇曰咸若我言則無爾終亂亂我政則爾不舍

皇曰岐伯天師爾司日月星辰陰陽曆數爾政爾考無有差貸先時者殺不及時者殺爾惟戒哉皇曰后土中正爾職山川草木蟲魚鳥獸爾察無亂田制以作田訟爾惟念哉皇曰龍東正爾分爵

祿賢知爾咨爾行無掩大賢以恡財無庇惡德以私賞皇曰融南
正爾平禮服祭祀爾正爾爲無亂國制以僭上無廢祀事以簡恭
爾惟念茲皇曰大封西正爾分干戈刑法爾掌以平皇曰大常北
正爾居田制民事爾訓爾均百工惟良山川爾圖爾惟勤恭哉皇
曰天師輔相五正百官士子農夫商人工技咸順我言終身於休

伏生尙書

天子出馬鳴中律步者有容大師乃奏登車告出也

散宜生南宮括閔天太公望見西伯於羗里西伯得此而免於虎
口孔子曰西伯得四臣丘亦得四友自吾得回也門人加親是非
胥附耶自吾得賜也遠方之士至是非奔走耶自吾得師也前有
光後有輝是非前後耶自吾得由也惡言不至於門是非禦侮耶
成王時三苗貫葉而生同一穗大幾盈車長幾充箱民有得而上
之王問周公曰何也周公曰天下其和爲一乎三年越裳氏重譯

言字卷二
來朝

尙書大傳

五嶽皆觸石而出雲膚寸而合不崇朝徧天下而雨

成王之時越裳重譯而來曰久矣天之無烈風迅雨意中國有聖人乎

尙書璇機鈐

帝堯煥炳隆興可觀曰載曰車曰軒曰冠曰冕作此車服以賜有功

鬼哭山鳴 鄭玄曰鬼哭誅無辜也山鳴聽不聰之異也

孝經援神契

太山天帝孫也主召人魂

蛟珠宋曰蛟魚之珠有光輝可以飾旗

德至山陵則景雲出 德至於艸木則木連理也德至艸木則芝

草生又曰善養老則芝草茂 德至水泉則黃龍見君之象也又
左契曰天子孝而龍負圖地龜出書也 德至鳥獸則麒麟臻鳳
皇翔鸞鳳舞 詩含神霧曰德化充塞照潤八冥則鸞臻 王者
奉己儉約臺榭不侈尊事耆老則白雀見 德至鳥獸白鳥下
白鹿見 白虎見 王者祭祀不相踰 宴食衣服有節則白雉
至 又德至鳥獸故雉白首 又妃房不偏白雉應
椒薑禦溫菖蒲益聰 神靈滋液則翠羽曜 天子孝天孽消滅
景雲出遊 德至八方則祥風至 神靈滋液百寶用則璣鏡出
大珠有光可以爲鏡

孝經緯

社土地之主地闊不可以盡敬故封土爲社以報功也稷五穀之
長穀衆不可以徧祭故稷神以祭也

黃河者水之伯上應天河

禮含文嘉

燧人炮生爲熟食人無腹疾遂天之意故爲燧人

明堂所以通神靈感天地正四時出教化崇有德彰有道也

神含神霧

秦地處中秋之位男懦弱女高瞭白色秀身音中商其言舌舉而仰聲清以揚

蹄羌之國其人自膝以下有毛如馬蹄嘗自鞭其脛日行百里

易飛候

鼠舞國門厥咎亡鼠舞於庭厥咎誅死

四方嘗有大雲五色俱其下賢人隱清雲潤澤蔽日在西北爲舉

賢良

正月有偃月必有嘉王

凡日食皆於晦朔食者名曰薄

京房易傳

木同本異枝其君有餘鄰邑來附者吉木生於君屋上及朝廷其君聖子木生而有實其國有慶木生於城脇一圍以上長數丈此謂城強其君大昌

嬖惡生孽蟲食苗心害忠良蟲食苗根無德節蟲食菜

誅不原情則霜附木不下不教而誅其霜反在草下

蟻封曰戾雨將至 海出巨魚邪人進賢人疏

五經通義

王者所以祭天地何也王者以父事天母事地子道也祭以丁辛反覆自丁寧也辛自克辛也

日月運行一寒一暑日在牽牛則寒在東井則暑牽牛水宿遠人故寒東井火宿近人故溫也

五經要義

古者后夫人必有女史彤管之法后妃羣妾以禮御于君所女史書其環以進退之生子月辰則以金環退之當御者以銀環進之著于左手既御者于右手左手陽也以當就男故著左手右手陰也御而復故

春秋漢含

蛾穴藏先知雨陰暄未集魚已噉喁巢居之鳥先知風樹木格鳥已翔翰

春秋考異

陰氣之專精凝合生雹雹之爲言合也

春秋說題

號者功之表諡者行之跡所以追勸成德也

星之爲言精也陽之榮也陽精爲日日分爲星故其字日生爲星

春秋繁露

法侔天地者稱皇帝天祐而子之稱天子

美惡之類是故以龍致雨以扇逐暑軍之所處生以棘楚

春秋運斗樞

北斗七星第一天樞第二璇第三璣第四權第五衡第六開陽第七搖光第一至第四爲魁第五至第七爲杓合而爲斗居陽布陰故稱北斗

春秋元命苞

天不足西北陽極於九故天周九八十一萬里天如雞子天大地小表裏有水地各承氣而立載水而浮天轉如車轂之過地者易也言萬物懷任交變化也自東極至於西極五億十萬九千八百八步

春秋感精符

麟一角明海內共一主也王者不刳胎不剖卵則出於郊

人主與日月同明四時合信故父天母地兄日姊月 注曰父天於圜丘之祀也母地於方澤之祭也兄日於東郊姊月於西郊

春秋潛澤巴

河水逆流怨氣盛也

天子無高屋榭高屋榭則人叛也

春秋緯

日之將蝕則斗第二星變色微赤不明而蝕

春秋符

王者政令苛則夏降霜誅伐不行則冬霜不殺草

吳越春秋

吳季札去徐而歸行道逢男子五月被裘采薪於道傍有委金季札見之謂薪者曰爾來取此金薪者曰君舉止何高而視何下也五月被裘采薪寧是拾金者乎

陳晉對越王曰弩生於弓弓生於彈彈生於古之孝子古者人民質朴死則裹以白茅投之中野孝子不忍父母爲禽獸所食則作彈以守之故古人歌曰斷竹續竹飛土逐肉

越王既棲會稽范蠡等曰臣竊見會稽之上有魚池上下二處水中有三江四瀆之流九谿六合之廣上池宜於臣畜魚三年其利可以致千萬越國當富盈矣

越王欲復仇冬寒則抱冰夏熱則握火愁心苦志懸膽于戶外出入嘗之不絕于口

晉春秋

大興中衡陽區純作鼠市四方丈餘開門門有一木人縱四五鼠于中欲出門木人輒以椎椎之

吳有張衡字思真明達天官能爲機巧作渾天儀使地居中以機動之若天轉而地止以上應度

齊春秋

王儉不好聲色未嘗遊宴衣裘服用自周而已

九州春秋

臧洪爲青州刺史爲袁紹所圍糧盡廚有米三斗主簿啓白欲以爲糜粥洪嘆曰吾獨食此何味命爲薄粥與衆共歆之

晏子春秋

北郭騷見晏子託以養母晏子分倉粟府金以遺之騷辭金受粟齊景公爲臺臺成又欲爲鐘晏子諫曰君旣已築臺矣又斂于民而爲鐘則民必哀矣斂民哀以爲樂不祥非所以君民也公乃止晏子曰君子居必擇鄰遊必就士可以避患也

景公所愛馬暴死公怒令刀解養馬者晏子請數之爾有罪三公使汝養馬汝殺之當死罪一又殺公之所愛馬當死罪二公以一馬之故殺人百姓怨吾君諸侯輕吾國汝當死罪三景公喟然曰

舍之

朝野僉載

二十卷 此書與今本出入甚多

唐張

鷺

司門員外郎號浮休子博陸人

周洛州司倉嚴昇期攝侍御史於江南道巡察性嗜水犢肉所至州縣烹宰極多小事大事入金則弭凡到處金銀爲之踊貴故江南人號爲金牛御史

唐劉仁軌爲左僕射天下號爲解事僕射

周鳳閣侍郎杜景佺文筆宏贍知識高遠時在鳳閣時人號爲鶴鳴雞樹王及善才行庸猥風神鈍濁爲內使時人號爲鳩集鳳池俄遷文昌右相無他政但不許令史奴驢入臺王終日迫逐無時暫捨時人號爲驅驢宰相

周春官尙書閔知微和默啜司賓丞田歸道爲副至牙帳下知微舞蹈宛轉抱默啜靴而鼻臭之田歸道長揖不拜默啜大怒倒懸之經一宿明日將殺元珍諫曰大國和親使殺之不祥乃放之及

歸與知微爭於殿庭言默啜必不和知微堅執以爲和默啜果反陷趙定知微誅九族拜歸道夏官侍郎右拾遺良弼使入匈奴坐帳下以不淨餒之良弼食盡一槃放歸朝廷恥之

周文昌左丞孫彥高無他識用性頑鈍出爲定州刺史歲餘默啜賊至圍其郭郭彥高卻鑰宅門不敢詣廳事文案須徵發者於小窗內接入賊旣乘城四入彥高乃謂奴曰牢關門戶莫與鑰匙其愚怯皆此類俄而陷沒刺史之宅先殲焉浮休子曰孫彥高之智也似鼠固其穴不知水灌而鼠亡鳥固其巢不知林燔而鳥殞禽獸之不若何以處二千石之秩乎

周契丹賊孫萬榮之寇幽州河內王武懿宗爲元帥引兵至趙州聞賊駱務整從北數千騎來王乃棄兵甲南走邢州賊退方便向前軍迴至都置酒會郎中張元一於御前嘲懿宗曰長弓短度箭蜀馬臨階騙去賊七百里隅牆獨自戰甲仗總拋卻騎猪正南躡

上曰懿宗有馬何因騎猪對曰騎猪者夾豕走也上大笑懿宗形貌姪醜故曰長弓短度箭

唐崔渾御史性至溫恭能盡色養父母少不安輒祈幽靈以身代母嘗有病渾跪請病授己有頃覺疾從十指入俄而徧身母所苦遂愈丁母艱勺飲不入口哀毀瘠立無何不勝哀而卒朝野傷之周左領軍將軍權龍褒不識忌日問府史曰何名稱忌對曰父母亡日請假獨坐房中不出褒至日于房中靜坐有青狗突入房中褒大怒冲破我忌更陳牒改到明朝好作忌日談者笑之

周定州刺史孫彥高被突厥圍城數十里彥高乃入櫃中藏令奴曰牢掌鑰匙賊來索慎勿與

周挽郎裴最於天官試問目曰山陵事畢各還所司供葬羽儀若爲處分最判曰大行皇帝奉敕昇遐凡是羽儀皆科官造卽宜貯納以待後需殿十選